

հոն համակերպելով իր հայրագիր մեծ եղբորը կամքին՝ կամուսնանայ մեծ հանդէսով. 5-6 ամիսէն մեծ եղբայրն ալ՝ իր յորդորմամբը՝ Կ. Պոլիս կուգայ, և հոն մանիֆաթուրայի խնդրանքի ու մատուցումի երկուստեք եռանդնոտ ստիպում մը՝ շո՛ւտ շո՛ւտ կընդարձակէ Մանուկեան եղբարց ախորժակներն և գործառնութիւնները, ու իրենց վարկ բացող թանգարները կըստիպեն ամէն շաբթու՝ անպայման եղանակով առնել իրենցմէ լայնավարկ և մեծաքանակ վաճառք: Երանելի՛ ժամանակք:

Այսպէս՝ Մանուկեանց գործն 1855-60ին կը հասնի նշանակելի մեծութեան, տարին 50-60000 ոսկիի գործ կը տեսնէին: Գարակէօզեան Կարապետ՝ ժամանակին պասմայի հրապարակին Յովսէփն և մտերիմը Սննեքերիմ Մանուկեանի՝ աննախանձաբար կը հիանար իր ճարպիկ գործունէութեանց վրայ և խորհրդակից կըլլար անոր. իր գործակատարներն էին՝ Եազըճեան իբրեւ ծախող, Կ. Եղիազարեան ապա Մանուկ Արզեան՝ իբր արկղակալ ու գրագիր:

Մանուկեան Սննեքերիմ կը գնէր ի Կ. Պոլիս՝ մանաւանդ պասմայի ճիւղը՝ Բափամաճեանց ալ հին տունէն. բայց ապա նկատելով որ անոնց տեսակները չեն կրնար գոհացունել զինքն՝ անոնց վրայ ղրկեց ի Մանչէսդըր Կարապետ Եղիազարեանը, և սկսաւ՝ Բափամաճեանց յանձնարարողէք տալով՝ ուղղակի Անգղիայէն իր անուոնին բերել վաճառք: Ետքը բացաւ ալ ի Մանչէսդըր զատ տուն՝ ընդարձակելով և ևս իր Կ. Պոլիսի ու Կեսարիայի<sup>(1)</sup> գործերն՝ ընկերութեամբ միշտ իր աւագ եղբարց և զլիաւոր գործնական վարիչն ինք ըլլալով ի Կ. Պոլիս, թէպէտ և սկիզբէն ալ իր եղբարցն ընկերութեամբ վաճառաշահած է անխափան:

(1) Բուն Կեսարիայի մէջ՝ վազուց կային հայ վաճառականներ ու մեծ ազգատոհմեր, եւ լԳրդ դարուն սկիզբը նշանակելի էին հոն Կիւմիւշեանք, Զարդարեանք, Պաշպազիրկեանեանք և այլք ոմանք. Սակայն չենք կրնար ծածկել փորձառուներու վկայութիւնն ալ՝ Թէ մասամբ Կեսարացիք ու Ալընցիք բարբի կողմէն հաղորդարար ու պարզմիտ նկարագիր մը չեն ցուցած.